

REGULAMENTO DE BOLSAS NA UNIVERSIDADE DA CORUÑA
(Aprobado na sesión do Consello de Goberno do 27 de setembro de 2007)

CAPÍTULO PRIMEIRO

Disposicións xerais

Artigo 1. *Obxecto*

1. O presente regulamento ten por obxecto regular as bolsas de investigación e de colaboración na Universidade da Coruña, debéndose entender por tales as axudas á investigación e á formación que a Universidade da Coruña conceda ou xestione para a promoción educativa, cultural, profesional, científica e artística.

2. Para os efectos deste regulamento, as bolsas revisten tres modalidades:

- a) Bolsas de formación específica en investigación financiadas por Organismos Internacionais, polo Estado, polas Comunidades Autónomas, por Fundacións, pola propia Universidade da Coruña ou por calquera outra entidade pública.
- b) Bolsas adscritas a contratos, convenios ou proxectos de investigación, sempre e cando ou propio convenio, contrato ou proxecto permita a convocatoria de bolsas.
- c) Bolsas de colaboración en órganos e servizos da Universidade da Coruña.

3. Ás anteriores modalidades resultarlles de aplicación o réxime que neste regulamento se establece, sen prexuízo da aplicación da lexislación xeral vixente.

4. Quedan fóra do ámbito de regulación do presente regulamento as seguintes modalidades:

- a) Bolsas e axudas para sufragar os gastos de matrícula ou estudo, total ou parcialmente, calquera que sexa a entidade concedente.
- b) Bolsas e axudas de comedores, transporte aloxamento ou análogas.
- c) Bolsas e axudas ao estudo para programas de cooperación educativa ou programas de formación en alternancia.

5. Igualmente, exclúense da presente norma as relacións que sexan obxecto de regulación polo Dereito laboral e da Seguridade Social, coa única excepción do establecido no artigo 46.4 da Lei Orgánica 6/2001, de 21 de decembro, de Universidades.

Artigo 2. Rexistro público de bolsas

1. Establecerase un rexistro público, único e centralizado de bolsas, no que se tomará razón das altas (bolsas aceptadas), das baixas (bolsas finalizadas) e das renuncias, ordenadas conforme a cada modalidade, así como unha sucinta referencia ás características destas bolsas, en canto ao obxecto, duración e contía. Este rexistro, que se axustará en todo momento ao establecido para tales efectos na lexislación sobre protección da datos, dependerá da vicerreitoría que asuma as competencias nesta materia.

2. En ningún caso se formalizarán documentos contables de abono nin se efectuará ningún pago en concepto de bolsas, sen a previa e preceptiva inscrición no rexistro de bolsas. A persoa responsable deste rexistro verificará previamente se se cumpriron os trámites preceptuados por este regulamento.

3. Comprobada a aceptación e posterior inscrición no rexistro, expedirase unha credencial cos efectos, responsabilidades e limitacións contidas no presente regulamento. Esta credencial deberá facer constar a modalidade de bolsa e a referencia á normativa e convocatoria respectiva, así como a súa contía e duración.

Artigo 3. Dos dereitos

1. As persoas beneficiarias dunha bolsa teñen dereito a percibir a axuda económica expresamente recollida na convocatoria correspondente e na súa concreta credencial. Esta axuda económica percibirase desde o comezo das actividades obxecto da bolsa, facéndose efectivo o seu abono cunha periodicidade mensual.

2. Ademais as persoas beneficiarias dunha bolsa terán:

- a) Unha persoa responsable da súa titorización, que tamén o será da súa formación, coordinando e orientando a súa actividade, de que se respecten os seus dereitos e de que cumpra coas súas obrigas.
- b) O apoio necesario para o desenvolvemento das actividades obxecto da bolsa.
- c) Información de todas as cuestións relacionadas coa súa actividade, así como dos criterios obxectivos conforme aos que se avaliará a memoria que deberá presentar.
- d) Un contorno de realización das actividades no que estean protexidas a súa seguridade e saúde.
- e) Protección fronte accidentes e enfermidades padecidas durante o período de goce da bolsa.
- f) Un certificado acreditativo das tarefas desenvolvidas unha vez rematado o prazo de duración da bolsa.
- g) Gozaren de calquera outro dereito recollido expresamente na correspondente convocatoria pública da bolsa.

Artigo 4. Das obrigas e das prohibicións

1. As persoas beneficiarias dunha bolsa teñen a obriga de:

- a) Asinar a aceptación e as condicións da bolsa.
- b) Incorporarse ao seu centro de destino na data indicada na convocatoria ou na concesión, salvo autorización expresa de quen convoque para facelo noutro momento. A falta de incorporación, ou a inasistencia ulterior inxustificada, interpretarase como renuncia á bolsa.
- c) Realizar as súas actividades con aproveitamento de acordo co obxecto da convocatoria públicas da bolsa e seguindo as instrucións da persoa responsable da súa titorización.
- d) Informar e responder da súa actividade. Ao remate da bolsa deberán entregar unha memoria avalada pola persoa responsable da súa titorización, quedando condicionado o último pago da bolsa á entrega e aprobación da memoria.
- e) A facer uso adecuado das instalacións e dependencias universitarias.
- f) Cumprir os deberes que podan vir establecidos na correspondente convocatoria pública da bolsa.

2. A persoa titular da bolsa en tanto ostente esta condición:

- a) Non poderá ocupar postos nin do persoal de administración e servizos nin do persoal docente e investigador ou que conleven a realización de labores propios deste persoal.
- b) Non gozará de exención dos prezos públicos universitarios, salvo que a convocatoria que orixine o nomeamento, ademais de proceder dun organismo público, inclúa expresamente esta previsión e reciba conformidade previa do/a reitor/a.
- c) Non poderá ocupar, nin sequera transitoriamente, cargo universitario algún, salvo que se trate de cargos para os que exista autorización expresa dos Estatutos da Universidade da Coruña, ben por tratarse de órganos abertos á provisión por calquera membro da comunidade universitaria, ou ben por ser cargos derivados da condición de representantes do estudiantado.

Artigo 5. Actividades a realizar

1. As persoas beneficiarias de bolsas realizarán todas aquelas actividades que se lles encomende de acordo co establecido en cada convocatoria.
2. Non realizaren actividades que non estexan relacionadas especificamente co obxecto da bolsa.

Artigo 6. Incompatibilidades

1. Durante o seu goce, a bolsa resultará incompatible con calquera outra axuda económica. Non serán incompatibles as bolsas reguladas neste regulamento coas bolsas e axudas ao estudo de carácter xeral para titulacións universitarias outorgadas pola Administración Xeral do Estado e pola Administración Autónoma ou da propia Universidade da Coruña.
2. Todas as bolsas serán incompatibles con calquera actividade retribuída.

Artigo 7. Remate das bolsas

As bolsas terminarán polas seguintes causas:

- a) Por finalización do prazo de duración fixado na correspondente convocatoria pública da bolsa, de acordo sempre co establecido neste regulamento.
- b) Por renuncia da persoa titular da bolsa.
- c) Por perda das condicións ou requisitos do nomeamento.
- d) Por revogación do nomeamento motivado no incumprimento das obrigas.
- e) Por outras causas que poida especificar a respectiva convocatoria.

Artigo 8. *Revisión e perda da bolsa*

1. A adxudicación das bolsas concedidas pola Universidade da Coruña poderá ser revisada mediante expediente contradictorio, cuxa resolución poderá dar lugar á perda do dereito á mesma e á devolución das cantidades indebidamente percibidas, dentro do período legal de prescripción, nos supostos en que tivesen concurrido ocultación, falseamento de datos ou calquera outra infracción do ordenamento xurídico.

2. Así mesmo, poderá perderse a bolsa nos casos de inhibición manifesta ou negligente cumprimento das actividades obxecto desta. Tales extremos deberán acreditarse no correspondente expediente contradictorio.

3. Corresponde ao/á reitor/a, ou persoa en quen delegue, a instrución e resolución do expediente ao que se alude nos apartados anteriores, quen poderá dispoñer a suspensión provisoria dos efectos económicos das bolsas.

4. As responsabilidades a que fai referencia o presente artigo enténdense sen prexuízo das de orde académica ou penal en que puideren ter incurrido.

Artigo 9. *Relación xurídica*

As actividades que, por razón das bolsas concedidas pola Universidade da Coruña, realicen as persoas titulares das mesmas, verificaranse sempre como consecuencia e no contexto dunha relación xurídica de estrita natureza administrativa, quedando excluídas das normas do Dereito do Traballo e da Seguridade Social.

CAPÍTULO SEGUNDO

Das bolsas de formación específica en investigación

Artigo 10. Modalidades de bolsas de investigación

1. As bolsas de investigación na Universidade da Coruña poden ser:

- a) Propias. Trátase das bolsas financiadas con cargo directo aos orzamentos e programas propios da Universidade da Coruña.
- b) Integradas. Trátase das bolsas dos Programas Estatais ou Autonómicos, ou liñas de axuda internacionais, dirixidas especificamente á formación do persoal investigador.
- c) Homologadas. Trátase das bolsas financiadas con cargo a programas e convocatorias de entidades públicas e privadas non incluídas no apartado anterior, e nos que participe a Universidade da Coruña, ben na valoración das propostas e adxudicación das bolsas ou ben no seguimento das actividades obxecto das mesmas. A homologación realizarase por solicitude da entidade concedente ou da persoa investigadora principal, logo da valoración favorable da Comisión de Investigación á vista das condicións das bolsas en canto a duración, dotación económica e aval investigador.
- d) Adscritas. Trátase das bolsas financiadas con cargo a programas, convocatorias ou liñas de financiamento público ou privado non universitaria, que non estean homologados.

Artigo 11. Persoas bolseiras adscritas

1. Os Centros, Departamentos, Institutos, Centros Tecnolóxicos, Servizos ou outros órganos universitarios que adscriban persoas bolseiras de calquera convocatoria non homologada, incluídas aquelas outras bolsas en cuxa xestión económica non participe a Universidade da Coruña, deberán comunicar a súa condición á vicerreitoría correspondente, indicando os datos identificativos da persoa beneficiaria, duración, obxecto e contía da bolsa.

2. A Vicerreitoría correspondente remitirá estes datos ao rexistro público de bolsas para a súa inscrición nun anexo especial reservado para os exclusivos efectos do seu control. Estas persoas, en tanto as súas respectivas bolsas non sexan homologadas expresamente, non terán a

consideración de bolsa de investigación de pleno dereito, e xa que logo, non poderán impartir docencia práctica.

Artigo 12. Consignación orzamentaria para o financiamento de bolsas propias e convocatoria

1. Como trámite previo á publicación da convocatoria de bolsas con cargo aos orzamentos da Universidade da Coruña, incorporárase certificación da Xerencia na que se acredite a existencia de crédito dispoñible para tales efectos, así como a retención de crédito correspondente.

2. Como mínimo, a convocatoria expresará, sempre detalladamente e con precisión, os requisitos que se esixan para formalizar a solicitude, os criterios de valoración dos méritos, a comisión encargada de valorar as solicitudes e resolver as convocatorias, a súa duración, unha descrición das actividades formativas a desenvolver, así como a súa dotación.

3. Daráselle a esta convocatoria a máxima difusión posible mediante a súa publicación no apartado específico de bolsas da páxina web da Universidade da Coruña, concedendo un prazo mínimo de seis días hábiles para a presentación de solicitudes. Finalizado este prazo, publicarase unha listaxe provisoria de persoas admitidas e excluídas e habilitarase un prazo non inferior a corenta e oito horas para a presentación de reclamacións. Trancorrido este prazo, a comisión procederá á resolución da solicitude da bolsa e á súa publicación no lugar no que se divulgou a convocatoria nun tempo máximo de dez días hábiles. Contra esta resolución, poderán presentarse os recursos administrativos previstos na lexislación administrativa vixente.

4. A comisión encargada de valorar as solicitudes será a comisión delegada correspondente do Consello de Goberno. No caso de non existir comisión delegada, excepcionalmente o Consello de Goberno creará unha comisión *ad hoc*, cuxa composición será elixida polo propio Consello de Goberno.

CAPÍTULO TERCEIRO

Das bolsas adscritas a contratos, convenios ou proxectos de investigación

Artigo 13. Persoas beneficiarias

1. Nos contratos, convenios ou proxectos de investigación que se formalicen coa Universidade da Coruña poderán consignarse fondos para a contratación de persoal en formación, aínda que, con carácter excepcional, sexa posible tamén a formalización de bolsas.

2. A finalidade destas bolsas é proporcionar unha formación práctica ao estudantado universitario dos dous últimos cursos de titulacións oficiais da Universidade da Coruña ou recentemente egresados de titulacións oficiais universitarias, mediante a súa participación ou colaboración en tarefas de investigación nun proxecto de investigación concreto, financiado por entidades públicas ou privadas, no marco dun convenio de colaboración ou dun contrato do artigo 83 da Lei Orgánica 6/2001, de 21 de decembro, de Universidades.

3. Serán condicións xerais para ser beneficiario deste tipo de bolsas:

a) Existir conexión entre a actividade obxecto da bolsa e o historial científico-técnico de que presenta a súa solicitude.

b) Ser estudante dos últimos cursos da Universidade da Coruña ou ter obtido un título oficial universitario dentro dos cinco anos inmediatamente anteriores á data de convocatoria pública da bolsa en cuestión.

4. Ademais, deberán cumprirse outros requisitos especificados na propia convocatoria pública correspondente.

Artigo 14. Procedemento

1. Os/As investigadores/as principais do obxecto do convenio, contrato ou proxecto de investigación, remitará ao Departamento correspondente a convocatoria da bolsa, que deberá axustarse ao modelo que figura no ANEXO I.

2. O Departamento en cuestión daralle a esta convocatoria a máxima difusión posible mediante a súa publicación nos taboleiros de anuncios do Departamento e do Centro ao que estea adscrito e no apartado específico de bolsas da páxina web da Universidade da Coruña, concedendo un prazo mínimo de seis días hábiles para a presentación de solicitudes. Finalizado este prazo, publicarase unha listaxe provisoria de persoas admitidas e excluídas e habilitarase un prazo non inferior a corenta e oito horas para a presentación de reclamacións. Trancorrido este prazo, procederase á resolución da solicitude da bolsa e á súa publicación nos mesmos lugares nos que se publicou a convocatoria nun tempo máximo de dez días hábiles. Contra esta resolución, poderán presentarse os recursos administrativos previstos na lexislación administrativa vixente.

3. A comisión encargada de valorar os méritos segundo o baremo que figura no ANEXO I estará formada cando menos polo investigador principal do proxecto de investigación e por un/ha profesor/a e por un/unha estudante do Consello de Departamento, elixidos/as polo Consello de Departamento.

4. Unha vez resolta a bolsa, esta comisión remitirá ao rexistro público de bolsas a convocatoria e a súa resolución.

5. O/A Reitor/a, a proposta do órgano correspondente nomeará ao bolseiro e dispoñerá que se lle estenda a credencial e se tome razón da súa inscrición no rexistro público de bolsas.

Artigo 15. Duración

1. A duración máxima das bolsas será dun ano, que poderá ser prorrogado só por un ano máis. En ningún caso, poderanse convocar bolsas cuxa duración exceda da que corresponde ao contrato, ao convenio ou ao proxecto de investigación.

2. O tempo de duración da bolsa comeza a computarse a partir da data da súa aceptación por parte da persoa titular. O comezo da realización das actividades formativas correspondentes en ningún poderá anticiparse a data de aceptación.

3. En calquera caso, entenderase automaticamente concluída a bolsa cando o faga o convenio, o contrato ou o proxecto de investigación do que traia causa, sen que se teña dereito a indemnización algunha.

Artigo 16. *Dedicación*

1. No caso de estudantado recentemente egresado de titulacións oficiais universitarias, a dedicación nas bolsas con cargo a convenios, contratos ou proxectos de investigación poderá ser a tempo completo ou a tempo parcial.

2. Teñen a consideración de bolsas a tempo completo aquelas que esixan unha dedicación mínima semanal de quince horas e unha máxima de trinta e cinco horas. Teñen a consideración de bolsas a tempo parcial aquelas que esixan unha dedicación semanal inferior á requerida para as bolsas a tempo completo, sen que, en ningún caso, poida estar por debaixo das cinco horas tamén semanais.

3. No caso de estudantado universitario dos dous últimos cursos de titulacións oficiais da Universidade da Coruña, a dedicación ás bolsas con cargo a convenios, contratos ou proxectos de investigación só poderá ser a tempo parcial.

Artigo 17. *Contía das bolsas*

O Consello de Goberno determinará anualmente, con carácter xeral, as contías máxima e mínima das axudas por bolsas, atendendo sempre ao tempo de dedicación e ao nivel de titulación esixido en cada convocatoria.

CAPÍTULO CUARTO *Das bolsas de colaboración*

Artigo 18. *Persoas beneficiarias*

1. Serán condicións xerais para poder beneficiarse de bolsas de colaboración en servizos universitarios da Universidade da Coruña:

- a) Estar cursando estudos oficiais na Universidade da Coruña.

- b) Non exceder de 28 anos de idade durante o período de goce da bolsa.
- c) Non percibir ningunha axuda nin realizar ningunha actividade remunerada.
- d) Existir conexión entre a actividade obxecto da bolsa e o perfil académico de quen presenta a súa solicitude.

2. As persoas que sexan beneficiarias destas bolsas só realizarán actividades de apoio aos servizos universitarios que permitan a súa formación teórica e práctica.

3. En calquera caso, a duración e o réxime de dedicación das bolsas deberán ser compatibles co correcto desenvolvemento da formación das persoas beneficiarias.

Artigo 19. *Procedemento*

1. A proposta do órgano do que dependa cada servizo, a Universidade da Coruña mediante resolución reitoral poderá convocar bolsas de colaboración. O órgano que propoña indicará por escrito, con precisión e baixo a súa responsabilidade, as actividades que se asignarán á persoa titular da bolsa de colaboración, que só poderán ser estritamente formativas e non consistentes en tarefas propias do persoal de administración e servizos e do persoal docente e investigador.

2. Como mínimo, a convocatoria expresará, sempre detalladamente e con precisión segundo o modelo que figura como ANEXO II, os requisitos que se esixan para formalizar a solicitude, os criterios de valoración dos méritos, a comisión encargada de valorar as solicitudes e resolver as convocatorias, a súa duración, unha descrición das actividades formativas a desenvolver, así como a súa dotación.

3. Daralle a esta convocatoria a máxima difusión posible mediante a súa publicación no apartado específico de bolsas da páxina web da Universidade da Coruña, concedendo un prazo mínimo de seis días hábiles para a presentación de solicitudes. Finalizado este prazo, publicarase unha listaxe provisoria de persoas admitidas e excluídas e habilitarase un prazo non inferior a corenta e oito horas para a presentación de reclamacións. Trancorrido este prazo, procederase á resolución da solicitude da bolsa e á

súa publicación no lugar no que se publicou a convocatoria nun tempo máximo de dez días hábiles. Contra esta resolución, poderán presentarse os recursos administrativos previstos na lexislación administrativa vixente.

4. A comisión encargada de valorar as solicitudes será a comisión delegada correspondente do Consello de Goberno ou as comisións correspondentes dos centros. No caso de non existir comisión, excepcionalmente o Consello de Goberno nomeará unha comisión *ad hoc*, que estará formada, cando menos, polo/a vicerreitor/a correspondente, o/a secretario/a xeral, o/a xerente, ou persoas en quen deleguen, o/a director/a ou xefe/a do servizo, dous/dúas estudantes elixidos/as polo Consello de Goberno e un membro do persoal de administración e servizos tamén do servizo.

5. O/A Reitor/a, a proposta do órgano correspondente nomeará ao bolseiro e dispoñerá que se lle estenda a credencial e que se tome razón da súa inscrición no rexistro público de bolsas.

Artigo 20. Principios de adxudicación

As bolsas de colaboración serán convocadas baixo os seguintes principios:

- a) Concorrencia. Publicarase a convocatoria no apartado específico de bolsas da páxina web da Universidade da Coruña.
- b) Obxectividade. A adxudicación das bolsas de colaboración só atenderá a méritos obxectivos.
- c) Rotación. Só se poderá gozar da mesma bolsa de colaboración unha vez.
- d) Formación titorizada. En todas as bolsas se procederá ao nomeamento dunha persoa responsable da titorización, que velará pola adecuada formación da persoa titular da bolsa.

Artigo 21. Duración e dedicación

1. A duración máxima das bolsas de colaboración será de doce meses. Finalizados os doces meses, as bolsas non poderán ser prorrogadas en ningún caso.

2. A dedicación nas bolsas de colaboración nunca poderá ser superior a quince horas semanais, sen que o tempo de dedicación diario poida exceder de catro horas.

Artigo 22. Contía das bolsas

O Consello de Goberno determinará anualmente, con carácter xeral, as contías máxima e mínima das axudas por bolsas de colaboración, atendendo sempre ao tempo de dedicación esixido en cada convocatoria.

Artigo 23. Consignación orzamentaria para o financiamento das bolsas

Como trámite previo á publicación da convocatoria, incorporárase certificación da Xerencia na que se acredite a existencia de crédito dispoñible para tales efectos.

Disposición Adicional primeira

1. O presente regulamento debe ser integrado e interpretado no marco do disposto nos Estatutos da Universidade da Coruña e das normas vixentes sobre o ensino universitario, así como do resto do ordenamento xurídico. En particular, para o que non estea disposto no presente regulamento nin nos Estatutos da Universidade, aplicarase o disposto na Lei de réxime xurídico das administracións públicas e do procedemento administrativo común.

2. O Consello de Goberno está facultado para interpretar e desenvolver o presente regulamento, así como para resolver todas as incidencias que puideran xurdir na súa aplicación.

Disposición Adicional segunda

1. Non poderán presentarse a convocatorias de bolsas de colaboración aquelas persoas que xa foran beneficiarias nalgunha ocasión de calquera bolsa de colaboración da Universidade da Coruña, sempre e cando o tempo conxunto exceda de doce meses.

2. En ningún caso a concesión dunha bolsa de colaboración implicará a incorporación da persoa interesada aos cadros de persoal da Universidade da Coruña.

3. Ter sido titular dunha bolsa nunca poderá implicar posuir un requisito exigible ou un mérito avaliábel para obter as prazas de persoal de administración e servizos.

Disposición Adicional terceira

Para os efectos de aplicación deste regulamento, a Universidade da Coruña habilitará un espazo específico na súa propia páxina web, no que se aloxarán todas as convocatorias de bolsas aquí reguladas.

Disposición Adicional cuarta

Declaranse nulas aquelas convocatorias de bolsas que non se axusten ao establecido no presente regulamento.

Disposición Adicional quinta

A modificación do presente regulamento compete ao Consello de Goberno da Universidade da Coruña.

Disposición Transitoria

Todas as bolsas ás que lles resulten de aplicación o presente regulamento e fosen convocadas con antelación á súa entrada en vigor, entenderanse a extinguir, séndolles de aplicación o réxime e condicións establecidos nas súas correspondentes convocatorias.

Disposición Final

O presente Regulamento entrará en vigor ao día seguinte da súa aprobación polo Consello de Goberno.

ANEXO I

MODELO DE CONVOCATORIA DE BOLSAS ADSCRITAS A CONTRATOS, CONVENIOS OU PROXECTOS DE INVESTIGACIÓN

A Universidade da Coruña fai pública esta convocatoria para estudantes dos últimos cursos da Universidade da Coruña ou para quen teña obtido un título oficial universitario con posterioridade a 30 de setembro de... .

OBXECTO DA BOLSAS:

O obxecto desta convocatoria é a adxudicación de... .. bolsa que facilite é unha formación práctica ao estudantado universitario dos dous últimos cursos de titulacións oficiais da Universidade da Coruña ou recentemente egresado de titulacións oficiais universitarias, mediante a súa participación ou colaboración en tarefas de investigación nun proxecto de investigación concreto, financiado por entidades públicas ou privadas, no marco dun convenio de colaboración ou dun contrato do artigo 83 da Lei Orgánica 6/2001, de 21 de decembro, de Universidades.

O importe total destas axudas ascende a... .. €con cargo a partida orzamentaria... ..
Esta convocatoria conta con dúas modalidades de bolsa:

Modalidade A: Renovacións **Modalidade B:** Bolsas de nova adxudicación

REQUISITOS DAS PERSOAS SOLICITANTES

A Universidade da Coruña convoca... bolsas adscritas ao contrato/convenio/proxecto.....
destinadas a aquelas persoas que cumpran os seguintes requisitos.

Modalidade A: Renovacións

- Ter sido beneficiario/a desta mesma bolsa na convocatoria anterior
- Contar co informe favorable da persoa responsable da súa titorización.

Modalidade B: Nova adxudicación

- Ser estudante dos últimos cursos da Universidade da Coruña, ou ter obtido un título oficial universitario con posterioridade a 30 de setembro de... .
- Non ter sido beneficiario/a de ningunha bolsa adscrita a contrato/convenio/proxecto durante un período superior a 24 meses

FORMALIZACIÓN DAS SOLICITUDES

Modalidade A: Renovacións

As solicitudes presentaranse por duplicado e acompañadas inescusablemente da seguinte

documentación:

- Formulario normalizado.
- Declaración xurada de non contar con ningunha axuda nin actividade remunerada
- Memoria do traballo realizado durante o período anterior, asinado pola persoa responsable da súa titorización.

Modalidade B: Nova adxudicación

As solicitudes presentaranse por duplicado e acompañadas inescusablemente da seguinte documentación:

- Formulario normalizado
- *Curriculum vitae* da persoa solicitante coa documentación que o acredite.
- Certificación académica detallada, na que consten as cualificacións obtidas, as datas de obtención e o número de convocatorias investidas en cada materia (orixinal ou fotocopia compulsada)
- Declaración xurada de non contar con ningunha axuda nin realizar ningunha actividade remunerada

CONTÍA E PERÍODO

O importe bruto da axuda será de € ao que se lle aplicarán, de for o caso, as retencións correspondentes.

Os pagos faranse con cargo á partida orzamentaria

A duración destas bolsas é de meses comprendidos entre o e o

A aceptación da bolsa farase mediante documento asinado pola bolseiro/a en que se compromete a cumprir todas as condicións recollidas nesta convocatoria.

COMISIÓN DE SELECCIÓN E CRITERIOS DE AVALIACIÓN

A Comisión de Selección estará constituída por :

Presidente/a:

Investigador/a principal

Vogais:

1 profesor/a do Departamento

1 estudante do Consello de Departamento

Criterios de avaliación:

Modalidade A:

Valoración de memoria do traballo realizado

Modalidade B:

Expediente académico: ... puntos (65% da puntuación total).

DEA: ... puntos (10% da puntuación total).

Mestrado oficial:... (5% da puntuación total).

Título de Doutoramento:... puntos (20% da puntuación total).

Outros méritos, que deben aparecer descritos na propia convocatoria,: ...punto (10% da puntuación total).

Coñecemento acreditado do galego:... (5% da puntuación total).

Quen teña o título de doutoramento non poderá obter puntuación polo DEA.
Só se valorarán os méritos que se acrediten documentalmente referidos á data de finalización de presentación de solicitudes.

Estas bolsas serán resoltas no prazo de..., contado a partir da data de finalización de presentación das solicitudes.

Contra esta resolución, a persoa interesada poderá interpoñer un recurso de reposición perante o/a reitor/a no prazo dun mes a partir do día seguinte ao da publicación desta resolución na páxina web da UDC.

OBRIGAS DAS PERSOAS BOLSEIRAS

Estas bolsas son incompatibles con calquera outra bolsa ou actividade remunerada, salvo as axudas que se convocan para realizar actividades formativas dos/as bolseiros/as (bolsas de viaxe, estadías de investigación, etc.) ou de axudas ao estudo.

As persoas bolseiras comprométense a realizar a súa actividade seguindo as indicacións da persoa responsable da súa titorización.

O incumprimento por parte da persoa bolseira dalgunha das condicións recollidas nas presentes bases suporá a perda da bolsa concedida e mesmo, o reintegro das cantidades percibidas.

Todas as baixas que se produciren, antes do..., serán substituídas por un suplente da relación que elaborará a comisión de selección.

As persoas bolseiras comprométense a presentar unha memoria, antes do... das actividades realizadas. O incumprimento desta obriga suporá a devolución da contía recibida.

A presente convocatoria debe ser integrada e interpretada ao abeiro do Regulamento de bolsas de Universidade da Coruña, aprobado na sesión do Consello de Goberno de

PRAZO E LUGAR DE PRESENTACIÓN DAS SOLICITUDES (modalidade A e B)

As solicitudes presentaranse no Rexistro Xeral da Universidade da Coruña (Rúa Maestranza 9, 15001 A Coruña) ou no Rexistro da Vicerreitoría do Campus de Ferrol (Rúa Dr. Vázquez Cabrera s/n. Esteiro. 15403 Ferrol) antes do das 14h do día

A Coruña

ANEXO II

MODELO DE CONVOCATORIA DE BOLSAS DE COLABORACIÓN

A Universidade da Coruña fai pública esta convocatoria de bolsas de colaboración para estudantes Universidade da Coruña.

OBXECTO DA BOLSAS:

O obxecto desta convocatoria é a adxudicación de... .. bolsa que permitan a formación teórica e práctica mediante a realización de actividades de apoio aos servizos universitarios

O importe total destas axudas ascende a... .. €con cargo a partida orzamentaria... ..

REQUISITOS DAS PERSOAS SOLICITANTES

A Universidade da Coruña convoca... bolsas de colaboración, destinadas a aquelas persoas que cumpran os seguintes requisitos:

- Estar cursando estudos oficiais na Universidade da Coruña.
- Non exceder de 28 anos de idade durante o período de goce da bolsa
- Non percibir ningunha axuda nin realizar actividade remunerada, agas as bolsas de axuda ao estudo.
- Non ter disfrutado de ningunha bolsa de colaboración.
- Existir conexión entre a actividade obxecto da bolsa e o perfil académico de quen presenta a súa solicitude.

FORMALIZACIÓN DAS SOLICITUDES

As solicitudes presentaranse por duplicado e acompañadas inescusablemente da seguinte documentación:

- Formulario normalizado
- *Curriculum vitae* da persoa solicitante coa documentación que o acredite.
- Certificación académica detallada, na que consten as cualificacións obtidas, as datas de obtención e o número de convocatorias investidas en cada materia (orixinal ou fotocopia compulsada).
- Declaración xurada de non contar con ningunha axuda nin realizar ningunha actividade remunerada.

CONTÍA E PERÍODO

O importe bruto da axuda será de € ao que se lle aplicarán, de for o caso, as retencións correspondentes.

Os pagos faranse con cargo á partida orzamentaria

A duración destas bolsas é de meses comprendidos entre o e o

A aceptación da bolsa farase mediante documento asinado pola persoa interesada en que se compromete a cumprir todas as condicións recollidas nesta convocatoria.

COMISIÓN DE SELECCIÓN E CRITERIOS DE AVALIACIÓN

A Comisión de Selección estará constituída por :

Criterios de avaliación:

Expediente académico: ... puntos (un mínimo do 70% da puntuación total).

Outros méritos, que deben aparecer descritos na propia convocatoria,: ...punto (até un máximo do 25% da puntuación total).

Coñecemento acreditado do galego:... (até un máximo do 5% da puntuación total).

Só se valorarán os méritos que se acrediten documentalmente referidos á data de finalización de presentación de solicitudes.

Estas bolsas serán resoltas no prazo de..., contado a partir da data de finalización de presentación das solicitudes.

Contra esta resolución, a persoa interesada poderá interpoñer un recurso de reposición perante o/a reitor/a no prazo dun mes a partir do día seguinte ao da publicación desta resolución na páxina web da UDC.

OBRIGAS DAS PERSOAS BOLSEIRAS

Estas bolsas son incompatibles con calquera outra bolsa ou actividade remunerada, salvo as que se convocan para a axudas ao estudo.

As persoas bolseiras comprométense a realizar a súa actividade seguindo as indicación do titor.

O incumprimento por parte da persoa bolseira dalgunha das condicións recollidas nas presentes bases suporá a perda da bolsa concedida e mesmo, o reintegro das cantidades percibidas.

Todas as baixas que se produciren, antes do..., serán substituídas pola seguinte persoa da relación que elaborará a comisión de selección.

As persoas bolseiras comprométense a presentar unha memoria, antes do... das actividades realizadas. O incumprimento desta obriga suporá a devolución da contía recibida.

A presente convocatoria debe ser integrada e interpretada ao abeiro do Regulamento de bolsas de Universidade da Coruña, aprobado na sesión do Consello de Goberno de

PRAZO E LUGAR DE PRESENTACIÓN DAS SOLICITUDES

As solicitudes presentaranse no Rexistro Xeral da Universidade da Coruña (Rúa Maestranza 9, 15001 A Coruña) ou no Rexistro da Vicerreitoría do Campus de Ferrol (Rúa Dr. Vázquez Cabrera s/n. Esteiro. 15403 Ferrol) antes do das 14h do día

A Coruña

